

- nia, largitudo, nobilitas ac ignobilitas, hae sunt proprietates animantium singulatim ex me derivatae. Septem Sapientes prisci, nec non quaterni Manues meae naturae cognati *fuere*, spiritales: unde propagatum in orbe terrarum genus humanum. Qui hanc meam maiestatem ac facultatem mysticam novit penitus, is indefessa devotione sese devovet sine ullo dubio. Ego Universi fons, ex me Univer- sum procedit; sic, arbitrati, me colunt sapientes contemplandi facultate praediti. Me meditantes, me quasi spirantes, admonentes sese invicem, enarrantesque me semper, delectantur atque exhilarantur. Hisce constanter devotis, colentibus me ex amoris officio, largior eam mentis devotionem, cuius ope me isti adeunt. Benignitate erga hos motus ego tenebras ex ignorantia ortas dispello, in mea ipsius natura permanens, scientiae lucerna luminosa.

## ARJUNAS loquitur:

- Tu es summum numen, summa mansio, lustramen praestantissimum. Te GENIUM aeternum, coelestem, Divis priorem, innatum, dominum declarant omnes Sapientes ac coelestis Sapiens Nâradas itidem, Asitas, Dêvalas, Vyâsas; et tute ipse mihi effaris idem. Omne hoc verum existimo, quod tu mihi dicis, Pulcricome. Tuam, sanctissime, visibilem praesentiam utique nec Divi norunt, nec Titanes; tute ipse tui tibi conscius te ipsum nosti, virorum praestantissime, animantium animator, princeps, Divorum Dive, mundi domine! Te decet plene effari divina, quae tibi insunt, miracula, quibus miraculis hosce mundos permeans consistis. Quomodo cognoscam ego te, mystice, vel indesinenter meditando? quibusnam tandem existendi modis concipiendus es